

Zacarías

Zacarías elqui se tlajtol pannextijquetl catli tlatcatqui ipan Babilonia huan ya mocuepqui tlali Judá ica Zorobabel. Yaya tequitqui ihuaya Hageo para quinyolchicahuase nopa masehualme para sempa quicualtlalise nopa tiopamitl. Zacarías eliyaya tlayacanquetl tlen se familia tlen totajtzitzi. Zacarías quiitac miyac tlanextili catli teyolchicajqui huan catli tenextili para TOTECO sempa quicualtlalis Jerusalén huan nopa tiopamitl huan quintlapojpolhuis inintlajtlacolhua. Zacarías más camanalti tlen nopa Mesías que nochi sequinoc tlajtol pannextiani. Tlayolmelajqui tlen quenicatza Jesús calaquis ipan altepetl Jerusalén ipan 9:9, quenicatza quinemascaquíaj ica 30 plata tomi 11:12, quenicatza quicocosquíaj 12:10, quenicatza miquisquíaj 12:10, quenicatza hualas ipan tepetl Olivos 14:4 huan quenicatza tlanahuatis ipan ni tlaltipactli.

Zacarías quiyiya eyi partes:

Zacarías 1—8 TOTECO quintemajmatía huan quinyolchicahua imasehualhua

Zacarías 9 Tlatzacuilitlistli para tlalme nechca israelitame

Zacarías 10—14 Itlanahuatijcayo Jesucristo huan nopa tlashuilitlistli catli hualas

TOTECO quinnotzqui imasehualhua

1 Ipan metztli chichahui ipan tocalendario^a quema Tlanahuatijquetl Darío yohuiyaya para ome xihuitl tlanahuatis, TOTECO nechmacac niitlajtol pannextijca se camanali. Na niZacarías catli niicone Berequías catli eliyaya icone Iddo. Huan yaya quiijto: **2**“Niamoteco nicualanqui chichahuac ica mohuejcapan tatahua. **3**Yeca ama nijnequi xiquinmaca israelitame ni camanali. Na, niininTECO Catli Niquinyacana Notequihuajcagua Ma Tlatlanitij niquijtohua: ‘Ximonechcahuica campa na, huan na nimonechcahuis campa amojuanti.’ **4**Amo ximochihuaca quen amohuejcapan tatahua quichijque quema nopa achitui tlajtol pannextiani quinihuijque para ma mocuepaca tlen nopa fiero ojtli catli quitoquiliyayaj. Quena, quinihuijque ma quicahuaca nochi nopa fiero tla-

mantli catli quichihuayayaj, pero ini-juanti amo nechtlacaquilijque, niyon amo quichihuiliijque cuenta nopa camanali.” Quej nopa quiijtohua TOTECO Catli Quinyacana Itequihuajcagua Ma Tlatlanitij.

5“Ama nochi amohuejcapan tatahua ya huejcajya mictoque. Huan amojuanti nojquiya quen amohuejcapan tatahua huan nopa tlajtol pannextiani tlen huejcajya san anitztose se tlatoctzi. **6**Pero nocamanal catli niquinilhui ipan nopa tonali por notlajtol pannextijcagua catli nechtequipanohuayayaj amo mijque. Senquistoc nochi nopa camanali huan tlanahuatili catli niquinilhui nopa israelitame mochijque ipan amohuejcapan tatahua quen niquijto para panos. Huajca teipa moyolcuetpque amohuejcapan tatahua huan quiijtojqque: ‘TOTECO, Ta Catli Tiquinyacana Motequihuajcagua Ma

^a1:1 Ipan octubre o noviembre ipan tocalendario tlen ama.

Tlatlanitij, techtlatzacuiltijtoc senquistoc quen techilhuijtoya techchihuilisquía. Huan quinamiqúi catli tijchijqui por nopa tlamantli fiero catli tijchihuyayaj huan nopa fiero ojtlí ípan catli tinemiyayaj.’”

Tlanextili tlen tlacame ípan cahuayojme

7 Huan sempa TOTECO nechmacac se camanali ípan nopa xihuitl quema Tlanahuatijquetl Darío yohuiyaya para ome xihuitl tlanahuatis. Elqui ípan 24 itequi nopa metztli majtactli huan se ípan tocalendario^b. Nopa metztli quitocaxtíaj Sebat. Huan TOTECO sempa nechcamanahui na, niZacarías, niitlajtol pannextijca huan niicone Berequías catli eliyaya ícone Iddo. 8 Quena, ípan nopa yohuali niqúitac se tlanextili huan ípan nopa tlanextili niqúitac se tlatcatl tlejcotoya ípan se cahuayo chichiltic catli moquetzayaya tepequespa campa tlafiero íca miyac cuame catli inintoca mirtos. Huan íca itztoyaj sequinoc cahuayojme. Sequin tlen nopa cahuayojme eliyayaj chichiltique, sequin costique huan sequinoc chipahuaque. Huan ípan sesen cahuayo tlejcotoya se tlatcatl. 9 Huan nijtlatzintoquili: “¿Tata, ajqueya injuanti huan para tlen tlejcotoque ípan cahuayojme? ¿Tlaque quinequi quijjtos?” Huan nopa tequihuajquetl catli nechcamanahuiyaya nechilhui: “Na nimitzilhuís ajqueya injuanti.”

10 Huajca nopa tlatcatl catli tlejcotoya ípan nopa cahuayo chichiltic ípan nopa mirtos huan catli elqui itequihua TOTECO nechilhui: “Ni cahuayojme huan catli inípan tlejcotoque itztoque catli TOTECO quinhualtitlantoc para nemise campa hueli ípan tlattipactli para quitlachilise catli onca.”

11 Huan huajca nopa sequinoc catli tlejcotoyaj ípan cahuayojme quiyolmelajque itequihua TOTECO catli itztoya campa nopa mirtos catli quiitaque, huan quej ni quihuijque: “Ya tijyahualojtoque nochí tlattipactli huan campa hueli onca tlasahuilistli huan temachili.”

12 Huan itequihua TOTECO motlatlajti íca TOTECO huan quijjto: “Oh, TOTECO, Ta Catli Tiquinyacana Motequihuajcahua Ma Tlatlanitij, ya quiipiya 70 xihuitl para ticualantoc íca altepetl Jerusalén ehuaní huan íca masehualme catli hualahuij tlen altepeme ípan tlali Judá. ¿Quesqui tonali noja polihui para sempa tiqúinnextilis motlaignelijcayo?”

13 Huan TOTECO camanaltic para quinanquili itequihua huan quihuij catli moquetzayaya nonechca camanali catli cuali huan catli teyolchicahua.

14 Huajca nopa tequihuajquetl nechilhui ma nitlayolmelahua ni camanali: “Quej ni quijjtohua TOTECO Catli Quinyacana Itequihuajcahua Ma Tlatlanitij: ‘Tlahuel niqúinínelía huan niqúintlasomati nopa masehualme ípan altepetl Jerusalén huan ípan tlali Judá huan nijnequiyaya san na ma nechínelica. 15 Nojqúiya tlahuel nicualantoc íca nopa tlamme catli ama mosiyajquetzaj pampa quema na nicualantoya san se quentzi íca nomasehualhua, nopa tlamme noja achi más fiero quinchihuilijque.’” 16 Huajca TOTECO quijjto: “Temachtli nimocuepas huan sempa nijtla-sojtlas altepetl Jerusalén. Huan nopona sempa quicualtlalise notiopa huan tepanchihuani quitamachihuase nopa altepetl huan sempa quisencahuase.” 17 Nojqúiya nechilhui noja ma niqúijto: “Quej ni quijjtohua TOTECO Catli Quinyacana Itequihuajcahua Ma Tlatlanitij: ‘Nijchihuas para noaltepehua huan nomasehualhua sempa ma quiipiya nochí catli cuali hasta mocahuas. Huan nijmocuitlahuis Sion^c íca nohueyi tlaicnelijcayo. Quena, niqúijtos para Jerusalén eltoc nopa altepetl catli nijtla-pejpenijtoc.’”

Tlanextili tlen nahui cuacuajtli

18 Teipa nijacotlachixqui huan niqúitac nahui cuacuajtli.

^b 1:7 Ípan 15 itequi febrero ípan tocalendario tlen ama. ^c 1:17 Sion huan Jerusalén quinequi quijjtos san se altepetl.

19 Huajca nijtlatzintoquili nopa tequihuaquetl catli nechcamanahuiyaya, huan niquilhui: “¿Tlaque quixnextíaj ne nahui cuacuajtli?”

Huan nechilhui: “Nopa nahui cuacuajtli quixnextíaj ininchahualis nopa tlalme catli quiپیay chicahualistli catli quinsemanque catli ehuayayaj tlali Judá, tlali Israel huan altepetl Jerusalén.”

20 Teipa TOTECO nechnextili nahui teposchihuani. 21 Huan na niqijto: “¿Tlaque hualajtoque quichihuaquij ne teposchihuani?”

Huan itequihua TOTECO nechilhui: “Nopa teposchihuani hualajtoque para quintejequilise inincuacua nopa tlalme catli quinsemanque tlali Judá ehuani. Quinquixtilise ininchahualis hasta ayacmo huelise moquetzase xitlahuac. Quena, quinchihuase ma huihuipicaca ica majmajtli nopa masehualme tlen tlalme catli nopa cuacuajme quixnextíaj.”

Tlanextili tlen se cinta para tlatamachihuase

2 Teipa nijcotlachixqui huan niquitac se tlatcatl huan ipan imax quiپیayaya se mecatl catli ica tlatamachihua. 2 Huan nijtlatzintoquili: “¿Canque tiya?”

Huan ya nechilhui: “Nijtamachihuati altepetl Jerusalén para niqitas quesqui ihuehueyaca huan quesqui ipatlajca.”

3 Huan niquitac nopa tequihuaquetl catli nechcamanahuijtoya quistejqui para monamiquiti ihuaya seyoc tequihuaquetl catli hualayaya quinamiqui. 4 Huan nopa tequihuaquetl catli hualayaya quilhui: “Ximotlalo campa ne telpoca tlatcatl huan xiquilhui para teipa altepetl Jerusalén quinpiyas miyac masehualme huan miyac tlapiyalme hasta ayacmo quincuis altepejtic huan miyac masehualme huan tlapiyalme mocahuase icalixpa nopa tepamitl. Pero injuanti itztose ica temachili, 5 pampa na, quijtohua TOTECO, nielis quen se tepamitl tlen tlitl catli quiyahualos altepetl Jerusalén para nijmocuitlahuis. Huan nijtemitis nopa altepetl ica notlatlanex.”

Itequihua TOTECO camanaltic por TOTECO

6-7 Huan TOTECO quijto: “¿Xijtlacaquili anisraelitame! Nimechsemanqui campa hueli quen se chichahuac ajacatl tlase-manasquí, pero ama nimechilhuía: ‘Xicholotehuaca tlen nopa tlali ica ajco campa ama anitztoque quen anseyoc tlali ehuani. Quena, anJerusalén ehuani, xijtlalcahuica tlali Babilonia huan ximomanahuica.’”

8 Pampa ya ni catli quijtohua TOTECO Catli Quinyacana Itequihuaquehua Ma Tlatlanitij. “Quema monextis nohueyitilis, yaya TOTECO nechtitlanis na ica ni camanali para ma niquinhuilanas nopa tlalme catli tlen hueli anmechchihuilijque. Pampa TOTECO quijtohua para aqui hueli catli anmechcuatotonía, animasehualhua, eltoc quen quicocohua iixteyol sitlal, nopa catli iaxca catli achi más quimocuitlahuía. 9 Yeca na noseltzi niqintepachos nopa tlalme huan nijchihuas para inintequipanoquehua ma quintlamitlachtequilica hasta amo tleno quiپیyase. Huan huajca quimachilise para TOTECO Catli Quinyacana Itequihuaquehua Ma Tlatlanitij nechtitlanqui na.

10 “Huajca xihuicaca huan xipaquica, amojuanti tlen altepetl Jerusalén, pampa na nihualas para niitztos tlatlajco amojuanti.” Quej nopa quijto TOTECO. 11 “Huan ipan nopa tonali nojqiya masehualme catli ehuj ipan miyac tlalme mosansejcotilise ica TOTECO. Huan masque amo israelitame, mochihuase nomasehualhua huan na nimocahuas para niitztos tlatlajco amojuanti. Huan huajca anquimachilise para TOTECO Catli Quinyacana Itequihuaquehua Ma Tlatlanitij nechtitlanqui campa amojuanti. 12 Huan TOTECO yancuic moaxcatis tlali Judá catli mopantía ipan nopa tlali catli tlatzejzeloltic huan sempa teyolmelahuas para quitlapejpenijtoc altepetl Jerusalén.”

13 Ipan nochi taltipactli ma amo aqui molini iixpa TOTECO pampa quistejqui ipan ichaj tlatzejzeloltic ipan ihuicac huan ya ajstoc ipan taltipactli.

Tlanextili tlen iyoyo tlapajpactic Josué

3 Teipa ipan nopa tlanextili, nopa tequihuaquetl nechnextili nopa hueyi totajtzi catli itoca Josué. Yaya moquetzayaya iixpa itequihua TOTECO. Huan campa inejmac Josué, moquetzayaya Amocualtlacatl huan quitlatelhuiyaya Josué ica miyac tlamantli.

2 Huan itequihua TOTECO quiilhui Amocualtlacatl: “Ma TOTECO mitztlatelhui, Amocualtlacatl. Yaya amo mitzselilia catli ica tijtelhuía ni tlacatl. Pampa TOTECO ya quitlapejpenijtoc para quitlasojtlas Jerusalén. Huan yaya quitlahuelcahuas catli ica tijtelhuijtoc ni totajtzi. Ni tlacatl itztoc quen se cuapipitzli catli nijmanahuía tlen se hueyi tlitl huan ya tlajco tlatlatoc.”

3 Huan quema Josué moquetztoya iixpa itequihua TOTECO, moquentiyaya yoyomitl catli tlhuel soquiyo.

4 Huajca itequihua Toteco quinilhui nopa sequinoc catli moquetzayayaj nopona: “Xijquixtilica Josué nopa yoyomitl catli tlhuel soquiyo.”

Huan teipa itequihua TOTECO quiilhui Josué: “Xiquita, ya ni quiijtosnequi ya nimitzquixtilijtoc nochi motlajtlacolhua. Huan yeca ama nijchihuas para ma mitzquentica yoyomitl catli nelía yejyectzi.”

5-6 Teipa nopa tequihuaquetl quincamanalhui nopa sequinoc catli nopona itztoyaj huan quinnahuati ma quitlalilica ipan itzonteco se cuatzajcayotl catli yancuic. Huan quitlalilijque. Huan quiquentijque iyoyo catli yancuic huan itequihua TOTECO moquetztoc inechca. Huan itequihua TOTECO quicamanalhui Josué huan quiilhui: **7** “Quej ni quiijtohua TOTECO Catli Quinyacana Itequihuaajcahua Ma Tlatlanitij: ‘Sintla tijtoquilis noojhui huan tijchihuas nochi catli nimitznahuatía, huajca nimitztequimacas titlayacanquetl catli quiipya más tequiticayotl ipan notiopa huan icalixpahua. Huan na nimitzcahuilis para ticalaquis huan tiquisas tlen na noixpa quen ni tequihuaajme quichihua.”

8 “Ta tiJosué catli tihueyi totajtzi inihuaya ni totajtztizi catli mosehuíaj moixpa, xijtlacaquilica cuali ya ni, pampa no-

chi amojuanti anquiixnextíaj nopa cuajcuali tlamantli catli hualase teipa. Temachtli na nijhualtitlanis notequipanojca catli itoca Chamanquetl. **9** Quena, xijtlachilica nopa tetl catli más ipati catli nimitztencahuilis, Josué. Nopa tetl quiipiyas chicome iixteyol catli quinextis para nochi quimatis. Huan ipan nopa tetl na nitlajcuilos. Huan san ipan se tonali nijtlamiquixtis nochi tlajtlacoli tlen ni tlali.” Quej nopa quiijto TOTECO Catli Quinyacana Itequihuaajcahua Ma Tlatlanitij.

10 “Huan anquinnotzase amohuampoyohua para ma mosehuica amohuaya amocalixpa inintzala xocomeca tzontli huan ininmatla higuera cuame. Huan anpaquise na sejco ica tlasehuilistli huan temachili.” Quej nopa quiijto TOTECO Catli Quinyacana Itequihuaajcahua Ma Tlatlanitij.

Tlanextili tlen tlahuil quetzali huan ome olivo cuame

4 Huajca nopa tequihuaquetl catli nechcamanalhuijtoya, nechixiti quen quiixitíaj se tlacatl catli coctoc. **2** Huan nechilhui: “¿Tlaque tiquita?”

Huan na niqUILhui: “Niquita se tlahuil quetzali catli tlachijchihuali ica oro, huan quiipya chicome tlahuilme. Huan ica huejcapa tlen nopa tlahuilme onca se caxitl campa quitecaj aceite. Huan yahualtic nopa caxitl, onca chicome tlahuilme huan tubos quisayayaj tlen nopa caxitl para quiapanoltise aceite ipan sesen tlahuili. **3** Huan ipan sese lado nopa caxitl onca se olivo cuahuitl. Se ipan inejmac nopa caxitl huan seyoc ica iopoch.” **4** Na nijsenhuiquili nicamanalti. Huan nijtlatzintoquili nopa tequihuaquetl catli camanaltiyaya nohuaya, niqUILhui: “Tata, ¿tlaque nochi ya nopa? Huan ¿Tlaque quiixnextíaj?”

5 Huan nopa tequihuaquetl nechilhui: “¿Melahuac amo tijmati tlaque quiixnextíaj?”

Huan na niqUILhui: “Melahuac amo nijmati, tata.”

6 Huajca yaya nechilhui: “Ya ni quiixnextía nopa camanali catli TOTECO quinequi quimacas nopa tequichijquetl Zoroba-

bel ica quenicatza quitlamiltis nopa tiopamitl: 'Amo por mosoldados, niyon por mochichualis. San por na notonaltzi mochihuas.' Quej nopa quijtohua TOTECO Catli Quinyacana Itequihuaajcahua Ma Tlatlanitij.

7 "Huan tlen hueli tlahuicayotl catli nesis quen se hueyi tepetl para quitzacuilis itequi Zorobabel, mocuepas ica se tlamayamitl catli amo más ohui. Huan quema quitlalis itlamiya tetl catli nelfa yejectzi ipan itzonatipa nopa tiopamitl, nochí israelitame tzajtzise ica paquilistli huan quijtose: '¡Ma TOTECO quitiochihua! ¡Ma TOTECO quitiochihua!'"

Zorobabel quisencahuas nopa tiopamitl

8 Huan TOTECO nechmacac ni camanali: 9 "Zorobabel quitlali itzinpehualtil nopa tiopamitl huan yaya quisencahuas. Huan huajca anquimachilise para TOTECO Catli Quinyacana Itequihuaajcahua Ma Tlatlanitij nechtitlanqui campa ta. 10 Ma amo aqui moilhui para amo tleno ipati nopa tlamantli tziquitetzitzi catli quichihuas para ica quipehualtis nopa tiopamitl, pampa paquise quema quuitase nopa plomada imaco Zorobabel quema nopa tequitl cuali yohui. Huan nopa chicome iixteyolhua TOTECO catli tlachiyaj campa hueli ipan nochi tlaltipactli quipalehuisse ma quitlamisencahua nopa tiopamitl."

11 Na sempa nicamanaltic huan nijtlatzintoquili: "¿Tlaque quixnextíaj ne ome olivo cuahuítl catli eltoque ipan sesen lado tlen ne tlahuítl quetzali?"

12 Huan nojquiya niqilhui: "¿Tlaque quixnextíaj ne ome ininmacuayohua ne cuame olivo catli quitoyahuaj nopa acete catli eltoque oro ipan nopa ome tubos tlen oro?"

13 Huan yaya nechilhui: "¿Amo tijmati tlaque quixnextíaj?"

Huan na niqilhui: "¡Amo, tata, amo nijmati!" 14 Huajca yaya nechilhui quen ni: "Quixnextíaj nopa ome tlacame catli quinajaltitjoque huan quinqequimacaque para quitequipanose TOTECO catli quinahuatía nochi tlaltipactli."

Tlanextili tlen nopa amatlajcuiloli catli patlani

5 Huan sempa nijcotlachixqui huan ni quitac patlanti se amatl catli qui piya tlaajcuiloli. 2 Huan nopa tequihuaquetl nechilhui: "¿Tlaque tiquita?"

Huan na niqilhui: "Niquita patlanti se hueyi amatl catli qui piya tlaajcuiloli. Huelis qui piya chicnahui metros ihuehueyaca huan nahui metro huan tlaajco ipatlaajca."

3 Huajca nechilhui: "Ipan nopa amatl ijcuilijtoc nopa tlatelchihualistli catli TOTECO quititlani ipan ni tlali. Ipan se lado ijcuilijtoc para nochi catli tlachtequij, quintojtocase. Huan ipan nopa seyoc lado ijcuilijtoc para nochi catli quitestigojquetzaj catli amo neli ayacmo hueli itztose nozona. 4 Ya ni catli quijtohua TOTECO Catli Quinyacana Itequihuaajcahua Ma Tlatlanitij: 'Na nijtitlanis ni tlatelchihualistli ipan ininchajchaj nochi catli momatque tlachtequij huan ipan ininchajchaj nochi masehualme catli tlatestigojquetzaj ipan notoca ica tlamantli catli amo melahuac. Huan nopa tlatelchihualistli catli nijtitlantoc mocahuas ipan sesen nopa calme hasta quintlamisosolose ica nochi inincuatetonyo huan nochi tetl tlatecpicholi.'"

Tlanextili tlen se sihuatl ipan se tlatamachihuali

5 Huajca nopa tequihuaquetl catli nechcamanalhuiyaya nechcajtejqui se tla-toctzi. Teipa sempa hualajqui huan nechilhui: "Ama xiajcotlachiya huan xijtlachili catli monextijtoc."

6 Huan nijtlatzintoquili: "¿Tlaque ya nopa?"

Huan yaya nechilhui: "Ya ne eli se chiquihuitl catli eli se tlatamachihuali para trigo huan temitoc ica nochi inintlaajtlacohua nochi masehualme catli itztoque ipan ni tlali."

7 Nopa chiquihuitl quipixqui itepos tzajca tlen plomo catli tlahuel etic. Huan teipa quitlananque iixtzajca huan ipan nopa chiquihuitl niqitac mosehujtoc se sihuatl. 8 Huan nopa tequihuaquetl nechilhui: "Nopa sihuatl quixnextíaj tlaajtlacolotl huan nochi catli amo cuali." Huan teipa

quicuatopejqui nopa sihuatl para sempa quicalaquís ipan nopa chiquihuitl huan quixtazajqui ica iixtazajca catli tlahuel etic.

⁹Teipa sempa nijtlachili huan niquintac ome sihuame catli patlantihualayajayaj campá tojuanti ipan nopa ajacatl ica inieltlapalhua. Huan ni sihuame quiqiyayaj inieltlapal quen ieltlapal nopa tototl catli quitocaxtíaj cigüeña. Huan injuanti quiucoj nopa chiquihuitl huan patlantiyajque huan quihuicaque ipan ajacatl.

¹⁰Huan nijtlatzintoquili nopa tequihuaquetl catli nechcamanalhuiyaya: “¿Canque quihuicaj ne chiquihuitl?”

¹¹Huan yaya nechilhui: “Quihuicaj ipan tlali Babilonia para quichijchihuilítij itiopa. Huan quema ya quisencajtose nopa tiopamitl, quitlalise nopa chiquihuitl no-pona ipan se mesa para quinextise.”

Tlanextili tlen nopa nahui carrojme

6 Sempa niajcotlachixqui huan niquintac nahui tlahuilanca carrojme catli quisayayaj tlatlajco tlen nopa ome huejhueyi tepeme catli eltoc quen nopa tepostli bronce. ²Nopa achtihui tlahuilanca carro quinpixtoya cahuayojme catli chichiltique catli quitlanayayaj. Nopa ompa tlahuilanca carro quinpixtoya cahuayojme catli yayahuique. ³Nopa expa tlahuilanca carro quinpixtoya cahuayojme catli chipahuaque. Huan nopa najpa tlahuilanca carro quinpixtoya cahuayojme catli ixtenextique.

⁴Huajca niqilhui nopa tequihuaquetl catli nechcamanalhuiyaya: “Tata, ¿tlaque quiixnextíaj ne tlahuilanca carrojme?”

⁵Huan yaya nechilhui: “Inijuanti quinixnextíaj nopa nahui tequihuaajme catli itztoque iixpa TOTECO catli quinahuatía nochi taltipactli. Huan hualahuij para quichihuaquij nopa tequitl catli TOTECO quinilhuitoc ma quichihuaca. ⁶Nopa carro ica cahuayojme catli yayahuique, yohuij ipan nopa tlali catli mocahua ica ajco. Huan nopa carro ica cahuayojme chipahuaque, yohuij ipan nopa tlali campá calaqui tonati. Huan nopa carro ica cahuayojme catli ixtenextique yohuij ipan nopa tlali catli mocahua ica tlani.”

⁷Pero nopa cahuayojme tlahuel mote-tiliyaj pampa quinequiyayaj yase para nemise ipan nochi taltipactli. Huan nopa tequihuaquetl quinilhui: “¿Cualtitoc! Xi-yaca huan xinemica campá hueli ipan nochi taltipactli.” Huan injuanti nimantzi quisque huan yajque ipan inintequi.

⁸Huajca itequihua TOTECO nechmacac na, niZacarías, ni camanali, nechilhui: “Xiquita, injuanti catli yajque ipan nopa tlali ica ajco, quitlalitoj tlatzacuiltli no-pona. Huan yeca mosiyajquetzotc noTonal nepa huan nechyoltlali tlen nohueyicualancayo.”

Se corona ipan itzonteco Josué

⁹Huan TOTECO nechmacac ni camanali, quiijto: ¹⁰“Xiya ama ipan ichaj Josías, icone Sofonías huan xijselili nopa plata huan oro catli quihualicaj Heldai, Tobías huan Jedaías catli mocueptoque tlen tlali Babilonia. ¹¹Huan ica nopa plata huan oro, xijchijchihua se corona, huan teipa xijtlalili ipan itzonteco nopa hueyi totajtzitzi Josué catli icone Josadac. ¹²Huan teipa xiquilhui Josué: ‘Quej ni quiijtohua TOTECO Catli Quinyacana Itequihuaajcahua Ma Tlatlanitij: Teipa hualas nopa tlatcatl catli itoca Chamanquetl. Yaya chamanis ica iseltzi huan quichijchihuas TOTECO itiopa. ¹³Quena, elis ya catli quichihuas itiopa TOTECO huan yaya quiqiyas ihueyitilis huan mosehuis quen tlanahuatijquetl ipan isiya campá tlanahuatía. Huan yaya nojquiya elis se totajtzitzi catli mosehuía ipan nopa siya tlen tlanahuatijquetl para tlanahuatis. Huan oncas tlasehuilistli ica nopa ome itequi.’

¹⁴“Teipa nopa corona xijtlalica ipan tiopamitl para anmehelnamiquiltis tlen catli temacaque Heldai, Tobías, Jedaías huan Josías icone Sofonías. ¹⁵Huan miyac masehualme catli huejca ehuan hualase para quipalehuse para quicuaitlalise itiopa TOTECO. Huan quema mochihuas ya nopa, anquimachilise para TOTECO Catli Quinyacana Itequihuaajcahua Ma Tlatlanitij nechtitlanqui campá amujuanti. Nochi ya ni panos quema amujuanti anquicaquise itoscac amoTECO Dios huan anquinelto-case.”

**Quenicatza monequi mosahuase
para quisas cuali**

7 Quema Tlanahuatijquetl Darío yohuiyaya para nahui xihuitl tlanahuatis sempa hualajqui se camanali tlen TOTECO para na, niZacarías. Nechmacac nopa camanali ipan 4 itequi nopa metztli catli itoca Quisleu, catli eltoc metztli chicnahui ipan tocalendario^d. ²Ipan nopa tonali nojquiya nopa masehualme tlen altepetl Betel quintitlanque Regem Melec, Sarezter huan ininmasehualhua ma yaca hasta itiopa TOTECO ipan Jerusalén para ma quitlajtlanitij TOTECO itlatiochihual. ³Huan nojquiya quinejque ma quitlajtlanitij nopa totajtzi sintla noja quisenhuiquilise chocase huan mosahuase iixpa TOTECO sesen xihuitl ipan metztli macuili quen quichijtoyaj para miyac xihuitl.

⁴Huan teipa sempa nechmacac se camanali TOTECO Catli Quinyacana Itequihuaicahua Ma Tlatlanitij, huan yaya quijito:

⁵“Xiquincamanalhui nochi masehualme ipan ni tlali huan nochi totajtzi-tzi huan xiquinilhui: ‘Ipan nochi nopa 70 xihuitl quema anchocayayaj huan amosahuayayaj ipan metztli macuili huan anilhuichihuayayaj ipan metztli chicome, ¿anmoilhuyayaj anquichihuayayaj para antechtlepanitaj huan para nelía anquicahuase amotlajtlacolhua huan anmonechahuse campa na? ¡Amo neli! ⁶Huan ama ipan ni tonali nojquiya, quema anquichihuaaj ilhuime, amo anmoilhuíaj tlen na. Anquichihuaaj para antlacaue huan antlaise san sejo, huan para anixhuse. ⁷Nelía san se ni camanali catli nimechilhuía ama ica nopa camanali catli huejcayja nimechmacac por notlajtol pannextijcahua. Ipan nopa tonali Jerusalén huan nochi ipilaltepetzitz huan nopa Neguev huan Sefela quinpixque tlahuel miyac masehualme huan quipixque tlahuehulitzi pampa ayamo niquintlatzacuiltiyaya.’”

Para tlen TOTECO amo quinnanquilía

⁸Teipa sempa TOTECO nechmacac na, niZacarías, se camanali huan quijito: ⁹“Ni-amotECO Catli Niquinyacana Notequihuaicahua Ma Tlatlanitij huan niqijtohua: ‘Xitlajtolsecahuaca xitlahuac. Monequi sesen amojuant ximotlasojtlaca huan ximoicnelica se ica seyoc quen anitztosquíaj anicnime. ¹⁰Amo xiquintlajiyohuilitca cahualme, niyon icnotzitz, niyon teicneltzitz, niyon masehualme catli hualahuij tlen seyoc tlali. Amo ximoilhuica ipan amoyolo para anquicocose seyoc masehuali.’

¹¹“Pero quema niqinilhui inin, amohuejcapan tatahua amo quichihuilijque cuenta nocamanal. Moicancuepque huan quitzajque innacas ica ininmacpil para amo quicaquise catli niqinilhuiyaya. ¹²Injuanti tlahuel moyoltetilijque pampa amo quinejque quitlacaquilise nopa camanali huan nopa tlanahuatili catli niinintECO niqinilhuiyaya por noTonal catli nijtitlanqui ipan nopa tlajtol pannextiani. Huan pampa amo quichihuilijque cuenta nocamanal, hualajqui ininpani nohueyi cualancayo niinintECO Catli Niquinyacana Notequihuaicahua Ma Tlatlanitij.

¹³“Huan pampa amo quichihuilijque cuenta quema na niqinnojnnotzqui, nojquiya ayacmo niquintlacaquili quema injuanti nechtzajtziyayaj.’ Quej nopa niqijtohua niamotECO Catli Niquinyacana Notequihuaicahua Ma Tlatlanitij. ¹⁴‘Huan niqinsemanqui amohuejcapan tatahua quen se chichahuac ajacatl quisemana tlasoli. Niqinchihualti ma yaca ipan nochi tlahuehulitca hual hui ipan tlatlactli. Huan inintlal mocajqui quen se tlamantli catli quitlahuelcajtoque huan sosoltic. Huan pampa ayacmo aqui panoc nozona, nopa tlali mocajqui quen se huactoc tlali.’”

**TOTECO quintlajtolcahuili para
quintiochihuas**

8 Huan sempa nechmacac se camanali TOTECO Catli Quinyacana Itequihuaicahua Ma Tlatlanitij, huan quijito: ²Quej

^{d7:1} Ipan 7 itequi diciembre ipan tocalendario tlen ama.

ni niamoTECO niquijtohua, na Catli Ni-quinyacana Notequihuajcahua Ma Tlatlanitij: “Tlahuel niqintlasomati nomasehualhua ipan Jerusalén pampa niquinicnelía miyac. Nijnequi san na ma nechicnelica huan nicualani miyac sintla amo nechicnelíaj.”³ Huajca ya ni catli TOTECO quijtohua: “Temachtli na nimocuepas ipan Sion huan nimocahuas para niitztos ipan altepetl Jerusalén. Huan nopa altepetl quitocaxtise: Altepetl tlen Catli Melahuac. Huan quitocaxtise: Itepe TOTECO Catli Quinyacana Itequihuajcahua Ma Tlatlanitij. Huan quitocaxtise: Tepetl Catli Tlatzejtzelolitic.”

⁴Quej ni quijtohua TOTECO Catli Quinyacana Itequihuajcahua Ma Tlatlanitij: “Altepetl Jerusalén sempa quipiyas paquiltli huan tlasehuilistli. Se tonali huehuentzitzli huan nanatzitzli sempa nejnemise ipan icalles. Huan sesen tlen inijuanti quihuicas icuatopil pampa miyac xihuítl quipiyase. ⁵Huan nopa calles temise ica miyac oquichpilme huan sihuapilme catli mahuiltise nopona.”

⁶Quej ni quijtohua TOTECO Catli Quinyacana Itequihuajcahua Ma Tlatlanitij: “Ipan nopa tonali nopa masehualme catli noja mocahuase, quisentlachilise quema sempa oncas miyac masehualme quen elisquía se tetzatl o se tlamantli catli hueyi, pero amo ohui para na, pampa amo tleno ohui para nijchihuas.” Quej nopa quijtohua TOTECO.

⁷Ya ni catli quijtohua TOTECO Catli Quinyacana Itequihuajcahua Ma Tlatlanitij: “Na niquinmaquixtis nomasehualhua ininmaco inincualancaitacahua catli itztocque ipan nopa tlalme campa hualquisa tonati huan nopa calaquí tonati. ⁸Niquinhualicas tlen campa huéli huan mocahuase para itztose ipan altepetl Jerusalén. Huan inijuanti elise nomasehualhua huan na nielis niininDios catli nelfa xitlahuac huan temachtli.”

⁹Quej ni quijtohua TOTECO Catli Quinyacana Itequihuajcahua Ma Tlatlanitij: “Xijpiyaca chicahualistli, amojuanti catli anquicaquij ni camanali por nopa tlajtol pannextiani huan anitztoyaj nopona que-

ma quitlalijque nopa tzinpehualtili. Xitequitica chicahuac huan xijtlamiltica nopa tiopamitl. ¹⁰Achtihuiya quema ayamo anquipehualtiyayaj para anquichihuase nopa tequitl, amo oncayaya tequitl, niyon toni para se quitlaxtlahuis seyoc para itequi o para itequi itlapiyal. Huan amo aquí huelqui quisas ipan altepetl huan quimati ica temachtli para mocuepas pampa nochi anquinpixque miyac amocualancaitacahua pampa nijchijtoya nochi amojuanti ximocualancaitaca se ica seyoc. ¹¹Pero ama ayacmo niquinchihuilis nomasehualhua catli noja mocahuase quen niquinchihuilí achtihui.” Quej nopa quijtohua TOTECO Catli Quinyacana Itequihuajcahua Ma Tlatlanitij. ¹²“Ama nijchihuas para pehuas para oncas tlasehuilistli campa amojuanti huan nijchihuas para xiitztoaca ica paquiltli. Nochi tlamantli catli anquitocase, temacase cuali itlajca. Huan xocomeca mili temacas cuali itlajca. Huan nopa tlali achi más tlaeliltis. Huan nopa mixtli quichihuas ma huetzi miyac atl. Nochi ni tlatiochihualistli quiselise nopa masehualme catli noja mocahuase ipan nopa tlali. ¹³Nopa tlalme catli amo quiximatij TOTECO quijtohuayayaj para anisraelitame tlen tlali Israel huan tlali Judá anquinxtiyayaj se tlamantli catli tlatelchihuali. Pero ama nimechmaquixtis huan nochi anmechitase para anitztose se tlatiochihualistli para nochime. Huajca amo ximajmahuica. Ximoyolchicahuaca huan xijpiyaca fuerza huan xijtlamiltica nopa tiopamitl.”

¹⁴Quej ni quijtohua TOTECO Catli Quinyacana Itequihuajcahua Ma Tlatlanitij: “Huejcayja quema amohuejcapan tathua nechcualancamacaque, nimotemacac para niqintlatzacuiltis huan, quena, niqintlatzacuilti. Amo nimoyolpatlac. ¹⁵Huan ama nojquiya catli niqijtohua para nijchihuas, temachtli nijchihuas. Huan ya nimotemacac para nijtiochihuas nochi altepetl Jerusalén huan tlali Judá, huan quena nijchihuas. Huajca amo ximajmahuica. ¹⁶Ya ni catli monequi anquichihuase amojuanti: ‘Ximocamanalhuica se ica seyoc ica camanali catli melahuac. Xitetlajtolsencahuaca xitlahuac. Huan xij-

temoca tlamantli catli anmechhualiquilis tlasehuilistli. ¹⁷Ma amo aqui moilhui ipan iyolo para quichihuilis seyoc se tlamantli catli amo cuali. Ayacmo xijtestigojquetzaca para melahuac se tlamantli catli anquimatij para amo melahuac quen ama anmechpactía anquichihuaj. Ya nopa amo nijnequi niquitas.’” Quej nopa quiijtohua TOTECO.

¹⁸Huan ajsic seyoc camanali tlen TOTECO huan quiijto: ¹⁹“Quej ni quiijtohua TOTECO Catli Quinyacana Itequihuajcagua Ma Tlatlanitij: ‘Nopa tonali quema anmosahuayayaj ipan nopa ilhuime ipan metztli nahui, macuili, chicome huan majtactli mocuepase tonali quema antlamahuisotij. Nopa ilhuime mocuepase tonali tlen paquilstli huan nochi israelitame ma paquica quema quinelnamiquise nopa tonali. Huajca xijnequica tlamantli catli melahuac catli quichihuas ma oncas tlasehuilistli.’ ²⁰Huan TOTECO Catli Quinyacana Itequihuajcagua Ma Tlatlanitij quiijto: ‘Masehualme catli itztoque ipan miyac altepeme huan tlamme campa hueli ipan tlatlactli hualase ipan Jerusalén. ²¹Masehualme tlen se altepetl yase quinitatij nopa masehualme catli itztoque ipan seyoc altepetl huan quinilhuittij: Ma tiyaca ipan altepetl Jerusalén para tijtemotij TOTECO Catli Quinyacana Itequihuajcagua Ma Tlatlanitij. Timotlatlajtise iixpa huan tijtlajtlanise ma techtiochihuas. Huan huajca quiijtose: Tojuanti nojquiya tiyase. ²²Huan hualase ipan Jerusalén miyac masehualme tlen miyac altepeme huan tlen tlamme catli quiipiyaj miyac chichahualistli. Huan quitemose TOTECO Catli Quinyacana Itequihuajcagua Ma Tlatlanitij huan motlatlajtise iixpa huan quitlajtlaniquij itlapalehuil huan itlatiochihualis.’

²³“Huan quej ni quiijtohua TOTECO Catli Quinyacana Itequihuajcagua Ma Tlatlanitij: ‘Ipan nopa tonali tlahuél miyac masehualme catli ehuaní ipan nochi tlamme huan catli camanaltij nochi tlamantli camanali, quiitzquise ipan iyoyo se israelita huan quiilhuise: Tiyase mohuaya pampa tijmatij para TOTECO Dios itztoc mohuaya.’”

Inintlatzacuiltl tlamme catli nechca

9 Ya ni nopa camanali catli TOTECO teyolmelajqui ica nopa tlatzacuiltli catli quinajsis altepetl Damasco huan tlali Hadrac ehuaní. Yaya quiijto: “Ipan nopa tonali nochi masehualme ipan nochi altepeme huan nochi nopa huejhueyi familias tlen israelitame nechtlachilise na, niininteco. ²Nojquiya altepetl Hamat catli mopantía nechca Damasco quipantis catli amo cuali huan altepeme Tiro huan Sidón nojquiya. Quena, quiselise tlatzacuiltli masque neltlalnamiqij. ³Masque ipan altepetl Tiro quichijchijtoque huejhueyi calme catli tilahuac para ipan momanahuise huan masque quiipiyaj tomi tlen plata huan tlen oro quen imiyaca tlaltejpocltli catli onca ipan calles, ⁴Toteco quiquixtis nochi catli quiipiyaj. Huan nochi nopa tlamantli catli quiitayaya para ichichahualis, Toteco quichihuas para ma huetzi ipan hueyi atl. Huan nopa altepetl tlamitlatlas.

⁵“Huan quema nopa masehualme catli itztoque ipan altepetl Ascalón quiitase para huetzqui altepetl Tiro, momajmatise miyac. Huan nopa masehualme catli itztoque ipan altepetl Gaza tlahuél motequipachose. Huan nopa masehualme catli itztoque ipan altepetl Ecrón huihuipicase pampa quiitase para altepetl Tiro ayacmo huelis quinmanahuis tlen inincualancaitacagua. Huan quinmictilise inintlanahuatijca nopa masehualme tlen altepetl Gaza. Huan altepetl Ascalón mocahuas quen tlali catli quitlahuelcajtoque pampa ayacmo mocahuas niyon se masehuali.

⁶“Huan seyoc tlali ehuaní hualase para itztose ipan altepetl Asdod. Huan por injuanti nijtlamiltis nochi catli ica mohueyimatiyayaj nopa filisteo masehualme. ⁷Nijchihuas para ayacmo quicuase se tlapiyali ica ieso. Huan ayacmo niqincahuilis ma quicuaca sequinoc tlamantli catli amo quinamiqij quicuase niyon quinhueyichihuase inintiotzitzti. Huan nochi injuanti catli noja mocahuase yoltoque nepa, quihueyichihuase Toteco Dios, huan mochihuase tequitini ipan tlali Judá. Huan masehualme nozona quinselise quen se familia catli yancuic. Quena, nopa filisteos tlen Ecrón

mochihuase san se ica israelitame quen huejcajya nopa jebuseos mochijque san se ininhuaya. ⁸Huan na niqinyahualos nomasehualhua quen se tlamocuitlahuij-quetl huan amo niqincahuilis nopa miyac soldados catli panoque ma mocuepase para quinhuilanaquij. Niyon se catli quintlajiyohuiltisquía ayacmo quema panos nica pampa ama na nitlachixtoc huan ni-quinmocuitlahuía.”

Hualas inintlanahuatijca israelitame

⁹¡Xipaquica miyac, anmasehualme ipan Jerusalén! ¡Xitzajtzica ica paquilstli, nochi anisraelitame campá hueli! Amotlanahuatijca neca huala. Yaya senquistoc xitlahuac huan temaquixtia. Moicnonequi huan huala ipan se pilburrojtzí. Quena, yaya huala ipan icone se síhua burro.

Tlaque quichihuas inintlanahuatijca

¹⁰Huan nopa Tlanahuatijquetl quijtohua: “Nijssolos nopa tlahuilanca carrojme catli quinpiyaj ipan tlali Israel campá itztoyaj iixhuihua Efraín huan nopa tlahuilanca cahuyojme catli itztoque ipan altepetl Jerusalén. Nijpostequis nopa cuahuitolme catli quitequihuíaj ipan tlahuilancayotl.” Quena, quej nopa quichihuas. Huan quinmacas tlasehuilistli nochi tlamme. Huan itlanahuatijcayo ajsis tlen se hueyi atl hasta seyoc hueyi atl. Huan tlen nopa atentli Eufates ajsis campá hueli hasta itlamiya tlatipactli. ¹¹TOTECO quijtohua: “Huan pampa nijchijqui se camanal sencahualí amohuaya, anisraelitame, catli quisellojhuijque ica estli huejcajya, yeca nimechmanahuis catli anitztoque ipan tlatzactli san se quen nijchololti José catli itztoya ipan nopa aostotl catli amo quipixqui atl huejcajya. ¹²Amojuanti catli antlatzacme, ximocuepaca nopan na catli niitztoc quen se cali catli tlahuel quiapiya chicahualistli. Nopan na anitztose temachtli. Nopan na ximotemachica quema noja onca tonali. Huan nimechyolmelahuas para nimechtiochihuas ome hueltas por sesen tlahuijcaoyotl. ¹³Pampa se tonal nijtequihuis tlali Judá ehuani quen nocuahuitol. Huan imasehualhua tlali Efraín

o Israel elis quen se cuatlamintli ipan nocuahuitol catli ica nitlahuilanas. Nopa telpocame ipan Jerusalén mooquichmatise huan elise quen se machete nomaco catli niqinhuicas ipan tlahuilancayotl ica nopa soldados catli tlali Grecia ehuani.”

TOTECO monextis para quinmanahuis imasehualhua

¹⁴Huan ipan nopa tlahuilancayotl, TOTECO monextis iniixco imasehualhua. Huan nopa cuatlamintli catli quintequihuis motlalose quen tlapetlanilotl. Huan TOTECO Dios quipitzas nopa tlapitzali huan quisas para mohuilanas ihuaya icuailancaitacahua. Huan yaya quiapiyas chicahualistli quen se hueyi ajacatl catli temajmatía nozona ica tlani. ¹⁵Huan TOTECO Catli Quinyacana Itequihuaicahua Ma Tlatlanitij quinmanahuis imasehualhua. Huan imasehualhua quintzontlamiltise inincualancaitacahua. Huan ininpan nejnemise quen teme para tlatehuitlatztli. Elise quen se tecuani catli quicua catli quitlantoc huan quijí ieso. Quema ya tlatlantose, imasehualhua tzajtzise ica paquilstli quen se catli quijitoc xocomeca atl catli cococ. Quema inijuanti quintzontlamiltise nochi inincualancaitacahua elise quen nopa caxitl ipan tiopa catli temitoc ica ieso nopa tlapiyali para ica quiatzejzelohuaj icuacua nopa tlaixpamitl. ¹⁶Huan ipan nopa tonali, TOTECO Dios quinmaquixtis imasehualhua quen se tlamocuitlahuij-quetl quinmanahuía iborregojhua. Huan ipan nopa tonali imasehualhua petlanise ipan itlal quen piltetzitzi catli yejyetzitzi catli quintlatzquiltitoc ipan se corona. ¹⁷Tlahuel cuajcaltzi elis nopa tlali huan nochi elis nelía yejyetzitzi. Huan pampa oncas miyac trigo huan miyac xocomecatl, nopa telpocame huan ichpocame moscaltise yejyetzitzi huan quiapiyase miyac chicahualistli.

TOTECO quinmaquixtis imasehualhua

10 Xijtlajlanica TOTECO ma huetzis atl quema ajsis tonali para seliyase cuame. Huan yaya catli quichihua ma tlapetlani huan ma onca huejhueyi mixtli an-

mechmacas atl hasta mocahuas. Quej nopa nochi toctli ipan nochi mila temacas cuali itlajca. ²Pero quema anquintlatzintotquiláaj tiotzitzise se tlenijqui, san tlapic catli anmechnextilise. Huan masque tetonalitani quijtohuaj para quipixque tlanextili campa quitaque catli panos teipa, nochi inincamanal san istlacatili. Tlayol-tlaláaj ica camanali catli amo neli huan quijtohuaj para amo huala tlatzacuilti. Yeca nochi israelitame yohuij ipan iniojhui quen borregojme catli amo quipiyaj se catli melahuac inintlamocuitlahuijca para quinmanahuisquía huan yeca nelía tlaijiyohuise.

³Huajca TOTECO quijtohua: “Tlahuel nicualantoc ica nopa tlamocuitlahuiani huan ica nopa tlayacanani catli amo melahuac huan yeca niquintlatzacuiltis. Pero niamoteco Catli Niquinyacana Notequihuajcahua Ma Tlatlanitij nihualas huan niquintiochihuas nomasehualhua catli iixhuihua Judá tlen huejcajya. Quena, niquinchihuas chichahuac huan yejectzitzitzi quen nocahuayo catli más mocualtlalijtoc para tlahuilanas huan más quipiya tlatlepanitacayotl. ⁴Huan se iteipan ixhui Judá elis quen nopa tetl catli más monequí para ipan quiquetzase se cali tlen tetl pampa itztoc catli más monequi ipan nopa cali catli na nijchihua. Yaya elis quen nopa tlaquetzali catli ipan quiquetzaj se yoyon cali. Elis quen nopa cuahuitoli catli más cuali para tlahuilancayotl. Huan iixpa ya cholojtehuase nochi tlayacanani catli quinequij tetlajiyohuiltise. ⁵Iteipan ixhuihua Judá elise soldados catli más motemacaj ipan tlahuilancayotl huan nejnemise ipan ininculancaitacahua quen elisquíaaj soquitl ipan calles. Huan tlahuilanas chichahuac pampa niininTECO niitztos ininhuaya. Huan quintlanise nochi ipan tlahuilancayotl hasta quinpinahualtise ininculancaitacahua catli tlejcoj ipan cahuayojme.

⁶“Huan na niquinmacas chichahualistli ininteipan ixhuihua Judá huan José huan niquinmaquixtis. Huan pampa niquintlasojtlas, niquinchihuas sempa ma mocuepaca huan itztose ipan inintlal. Huan elis quen amo quema niquintlahuelcajtoc pampa na niDios niininTECO huan nijtla-

caquilis nochi catli quijitose quema motlaltajtise ica na. ⁷Huan iteipan ixhuihua Efraín mochihuase quen tlahuilanani catli tlahuel motemacaj huan quipiyaj miyac chichahualistli. Huan paquise miyac quen paquij tlacame catli quijitoque miyac xomeca atl. Huan ininconeuhua quuitase quenicatza niininTECO niquinicnelía huan yolpaquise noixpa. ⁸Huan niquiquisis para niquinnotzas ma hualaca huan niman-tzi hualase mosentilise pampa ya niquinmaquixtjtoc. Huan nopa quentzi israelitame catli noja mocahuase yoltoque, pehuase momiyaquilise huan sempa mochihuase nelmiyaqui masehualme quen eliyayaj achtihuiya. ⁹Masque niquinsemantoc nopa israelitame campa hueli ipan talme catli nelhuejca, nopona sempa nechelnami- quise huan nechtemose. Huan inijuanti huan ininconeuhua mocuepase para sempa itztose ipan inintlal. ¹⁰Quena, niquinchihuas ma mocuepaca tlen tlali Egipto huan tlen tlali Asiria. Huan niquinhualicas hasta ipan tlali Galaad huan ipan tlali Líbano. Huan itztose tlahuel miyaqui inijuanti catli mocuepase hasta ayacmo quipiyase campa mochihuase. ¹¹Huan masque quipanose tlahuijcajotl quen huejcajya quema quipanoque nopa Hueyi Atl Chichiltic, na nijtzacuilis ichichahualis nopa atl para ma amo quincocos. Nopa hueyatl Nilo ipan tlali Egipto, nijchihuas ma huaqui para huelis quisase ipan nopa tlali. Huan niquinpinahualtis nopa tlayacanani ipan tlali Asiria catli tlahuel mohueyimatiyayaj huan nijtlamiltis nopa tequiticayotl catli tlali Egipto quipixqui.

¹²“Huan nijchihuas para nomasehualhua ma quipiyaca chichahualistli noixpa. Huan inijuanti nejnemise nica huan neca campa quinequise huan quihuicase notoca na.” Quej nopa quijto TOTECO.

Quihuejcamajcahuase inintlamocuitlahuijca

11 ¡Xiquitaca! Nopa tlali ipan Israel catli itoca Líbano quiselis se hueyi tlatzacuiltistli. Elis quen quitlapan ipuertas para ma calaquise se hueyi tlitl huan nopa tlitl quintlamitlatis nochi tiocuame ca-

tli más yejectzi quipixqui. ²Huan nochi masehualme nozona tlahuel motequipachose huan hasta elis quen nopa cuame tlen ocotl chocase pampa quimatise san se ininpanstis. Ama ya huetztoque nopa tiocuame masque eliyayaj nelía yejectzitzihuan huejcapantique. Eltoc quen nopa ahua cuame nozona campa itoca tlali Basán chocaj ica majmajtli pampa nochi cuatitlamitl catli quipiyayaya miyac cuame hasta amo aqui huelqui pano nozona, ama ya quintlahuisojtoque tlalchi. ³Xijtlacacuilica quenicatza chocaj nopa tlamocuitlahuiani tlen borregojme ipan tlali Israel pampa nochi nopa sacapetlatl campa quinnemiltijque inintlapiyalhua ya sosolijtoque. Ama san caquísti cone tecuanime catli nanalcaj pampa ya tlanqui nochi nopa yejectzi cuatitlamitl nechca hueyatl Jordán campa mocajque para itzose.

Ome tlamantli tlamocuitlahuiani

⁴Quej ni nechilhui NoTECO Dios: “Xiya huan xiquinmocuitlahui nomasehualhua catli itztoque quen borregojme catli tlaiyocatlalilme para miquise. ⁵Quen tlacohuani catli quincohuaj borregojme huan quinnictíaj huan amo tleno moilhuíaj, nopa israelita tlayacanani quinnictíaj nomasehualhua huan amo momacaj cuenta sintla quihuicaj tlajtlacoli. Huan quen tlanemacani quinnemacaj borregojme huan san quijtohuaj: ‘Tlascamati TOTECO pampa ya nimochijtoc nirico’, nopa israelita tlayacanani catli itztoque quen tlamocuitlahuiani catli amo melahuac quintemactilíaj nomasehualhua ma miquise huan amo quintlasojtlaj. ⁶Para na ayacmo niquintlapojpolhuis catli fiero itztoque ipan ni tlali. Nijchihuas para sese injuanti ma huetzica ininmaco ininhuampoyohua huan imaco inintlanahuatijca huan injuanti quinquichtzontequise. Huan nopa amo cuajcualme quichihuase para nopa tlali ma mocahua quen huactoc tlali, pero na amo niquinmanahuis nomasehualhua tlen nopa amo cuajcualme.”

⁷Huajca na nimotlali para niquinmocuitlahuis nopa israelitame catli quichiayayaj tlitzacuiltli huan itztoyaj quen bo-

rregojme catli ya tlaiyocatlalilme para miquise. Ni borregojme quixnextiyayaj catli más teicneltzitzitlen tlen nopa masehualme. Huan teipa nijcuic ome cuatopili. Se nijtocaxtlali “Itlasojtlacayo”. Huan nopa seyoc nijtocaxtlali “Quinchijtoc San Se”. Huan quej nopa, niquinmocuitlahui nopa borregojme quen se cuali tlamocuitlahuiquetl quichihuasquía huan quen TOTECO nech-nahuatijtoya. ⁸Huan ipan se metztli, niquintzontlamilti eyi tlamocuitlahuiani. Pero amo nijpixqui noyolo ica nopa borregojme, niyon ica masehualme tlen nopa tlali, huan yeca injuanti nechcualancaitaque.

⁹Huajca quej ni niquinilhui masehualme tlen nopa tlali catli itztoyaj quen nopa borregojme: “¡Ayacmo nielis niamotlamocuitlahuijca niyon ayacmo nimechtlamacas! Sintla anquinequij anmiquise, huajca ximiquica. Sintla se quinequi anmechmictis, huajca ma anmechmicti. Huan catli noja mocahuase, ma motzontlamiltica se ica seyoc.”

¹⁰Teipa nijcuic nopa cuatopili catli itoca: “Itlasojtlacayo” huan catli quinextía noteicnelijcayo huan nijtlajcopostejqui. Ya nopa nijchijqui para nijsosolos nopa camanal sencahuali catli nijchijtoya ica nochi tlalme. ¹¹Huajca quej nopa ipan nopa tonali tlanqui nopa camanali catli nijchijtoya ininhuaya. Huan nochi nopa masehualme catli teicneltzitzitlen nechtlachilijtoyaj huan quimachilijque para ica nopa tlamantli catli nijchijqui quinnextiliyaya catli TOTECO quinequiyaya quinyolmelahuas.

¹²Huan niquinilhui nopa tlayacanani: “Sintla anmechpactía huajca techtlaxtlahuica tlen catli anquijitaj nitequititoc. Huan sintla amo anmechpactía, huajca san xijcahuaca.”

Huajca injuanti nechpatiitaque huan nechmacaque 30 plata tomi.

¹³Huan TOTECO nechilhui: “Xijcui nopa piltlaxtlahuiltzi catli mitzmacaque quen motlaxtlahuil huan xijmajcahua ipan itiopa TOTECO para ma quicahuaca campa quiajocuij tomi.” Huajca nijcuic nopa piltomintzitzitlen huan nijcuamajcajqui

ipan itiopa TOTECO para quitlalise campa quiajocuij tomi. ¹⁴Teipa nijtlajcopostejqui nopa seyoc cuatopili catli itocayaya: “Quinchijtoc San Se”. Huan quej nopa, ni quixnexti para tlali Judá huan tlali Israel catli achtihuiya mocajque sentic, ya molajcoitaque.

¹⁵Huan TOTECO nechilhui: “Xijchihua-ti sempa nopa tequitl tlen se tlamocuitlahuijquetl pero ama ximochihua quen se tlamocuitlahuijquetl catli amo cuali huan xijcui nopa tlamantli catli yaya quihuicasquía. ¹⁶Ya ni quinnextilía para nijtlalis ipan ni tlali se tlamocuitlahuijquetl catli amo quintemos nopa pilborregoijtzi catli mocuapolojtoque, niyon amo quinmocuitlahuis catli ontlacajtoque, niyon amo quinpajtis catli mometzpostectoque, huan niyon amo quiajcolpantlalis nopa borrego catli más siyajtoc. Pero quena, quicuas innacayo nopa borregojme catli más tomahuaque. Huan hasta iniisti nojquiya quitzayanás huan quicuas. ¹⁷Fiero ipantis nopa tlamocuitlahuijquetl catli amo tleno ipati huan catli quintlahuelcahua nopa borregojme. Ica imachete TOTECO quimaquilis ipan iajcol huan iixteyol catli inejmac. Huan imax catli quinpalehuijtosquía iborregojhua mocahuas senquistoc huactoc. Huan iixteyol catli quintlachilijtosquía mocahuas popoyotzi.”

TOTECO quimanahuis altepetl Jerusalén
12 Ya ni nopa camanali catli TOTECO nechmacac tlen catli ininpantis israelitame. Quena, TOTECO catli quipatlajqui ilhuicactli, huan quitlalili itzinpehualtil ni tlaltipactli, huan quichijqui nopa tonaltzi catli eltoc ipan iyolo sesen masehuali quej ni, quijtohua: ²“Nijchihuas altepetl Jerusalén para elis quen se caxitl catli temitoc ica nocualancayo para nochi sequinoc tlamme. Elis quen temitoc ica se pajtli catli tlahuel cococ huan fiero. Huan quinchihuas ma moihuintica huan ma huipicaca nochime catli ehuj ipan tlamme catli quinequise quihuilanase tlali Judá huan altepetl Jerusalén. ³Quena, ipan nopa tonali nijchihuas Jerusalén ma eli quen se hueyi tetl catli tlahuel etic. Huan mas-

que nochi tlamme mosentilise para quihuilanase, nochi catli quinequise quiolinise, quintlamitepachos.” ⁴Quej ni quijtohua TOTECO: “Ipan nopa tonali, na ni quinte-majmatis nochi cahuayojme catli quinhualicaj soldados para quihuilanase altepetl Jerusalén. Huan nopa soldados catli ipan tlejcoitoque ni quinchihuas ma tlapoloca. Pero na ni quinmocuitlahuis nochi tlali Judá ehuan. Huan nochi cahuayojme catli ininpan tlejcoitoque para tlahuilanase mocuepase popoyotziti.

⁵“Huan nopa tlayacanani ipan tlali Judá quitase ya ni huan quijtose: ‘Xiquitaca, Jerusalén ehuan quipantíaj chichualistli ipan TOTECO Catli Quinyacana Itequihuaicahua Ma Tlatlanitij pampa yaya catli ininTeco.’

⁶“Ipan nopa tonali nijchihuas nopa tlayacanani ipan tlali Judá elise quen se tlicuahuitl catli quichihuas ma tlatla miyac cuame ipan se cuatitlamitl. Itztose quen tlicuahuitl catli quichihua ma tlatlas trigo pixquistli catli huactoc huan nopa tlayacanani quintlatise nochi tlamme catli mocahuaj nechca tlen ininejmac hasta inipoch. Pero ipan nopa tonali quema Judá ehuan quintlanise nopa tlamme, altepetl Jerusalén sempa temis ica masehualme ica miyac paquilistli para itztose ipan inialtepe.

⁷“Pero na, niamotECO, achtihui ni quinmaquixtis nopa masehualme catli itztoque ipan tlali Judá huan teipa ni quinmaquixtis catli ehuan ipan altepetl Jerusalén. Nijchihuas ya nopa para nopa masehualme catli ehuan ipan altepetl Jerusalén catli iteipan ixhuihua David amo quiselise más tlatlepanitacayotl que ne sequinoc catli itztoque ipan sequinoc altepeme ipan tlali Judá. ⁸Ipan nopa tonali TOTECO quinmanahuis nopa masehualme catli itztoque ipan altepetl Jerusalén. Huan yeca se catli amo quiapiyas más chichualistli ipan nopa tonali quiapiyas chichualistli quen Tlanahuatijquetl David. Huan catli hualahuij ipan iteipan ixhuihua David elise quen Toteco Dios huan quen itequihuaicahua TOTECO catli yohuij iniixpa nomasehualhua. ⁹Huan ipan nopa tonali ni-

moltlalis para niqintzontlamiltis nochime tlen nochi tlalme catli hualase para quihuilanase altepetl Jerusalén.

Moyolcuepase israelitame

10 “Huan ipan nopa tonali niqinmacas iteipan ixhuihua David huan nochi catli itztoque ipan Jerusalén nopa Tonaltzi catli quinpalehuis para moicnelise huan motlatlajtise. Huan injuanti nechitase na catli nechtlapolijque noelchiquicanahuiya huan nechchoquilise quen chocaj tetajme quema miqúi se conetl catli iyoytzi. Huan motequipachose por na quen motequipachohuaj quema miqúi se achtihui ejquetl. 11 Huan ipan nopa tonali, ipan altepetl Jerusalén chocase huan motequipachose achi más huan amo quen panoc quema mijqui nopa cuali tlanahuatijquetl catli itoca Josías huejcajya nechca Hadad Rimón ipan nopa tlamayamitl catli itoca Me Guido.

12 “Nochi israelitame campa hueli ipan ni tlali chocase miyac ica catli nechchihuilijtoque. Sesen huejhueyi familia chocase iyoca. Tlacame catli itztoque iteipan ixhuihua David yase iyoca. Huan ininsihuajhua nojquiya moiyoacaquixtise para motequipachose. 13 Huan chocase huan motequipachose ininseltzitzitzi nochi iteipan ixhuihua Leví. Huan ininseltzitzitzi motequipachose iteipan ixhuihua Simeí. Huan sihuame motequipachose iyoca tlen inin huejhuejhua. 14 Huan chocase nochi ipan nochi sequinoc huejhueyi familias tlen israelitame. Huan sesen hueyi familia chocas huan motequipachos iyoca por catli nechchihuilijtoque. Huan sesen tlatatl chocas iyoca tlen isihua.

13 “Ipan nopa tonali nijtlapos se ameli campa meya miyac atl para nochi iteipan ixhuihua David huan nochi Jerusalén ehuani. Huan nopa atl quinpajpacas tlen inintlajtlacolhua huan tlen nochi tlamantli catli ica moijtlacojtoque. 2 Ipan nopa tonali niqintlamiixpolihuiltis nochi tiotzitzitzi huan tlaixcopincayome catli quinhueyichihuaj ipan nopa tlali huan ayacmo quema quielnamiquise inintoca. Nojquiya niqintlamiixpolihuiltis nopa

tlacajcayajca tlajtol pannextiani huan nochi nopa ajacame tlen Amocualtlacatl catli quinyacana.” Quej nopa quijtohua TOTECO Catli Quinyacana Itequihuajcahua Ma Tlatlanitij. 3 “Huan sintla noja motlananas se huan camanaltis quen se tlajtol pannextijquetl, itata huan inana quiihui-se: ‘Monequi timiquis pampa tiistlacatitoc. Tiquijtohua para TOTECO mitzmacatoc mocamanal, pero yaya amo quijtojtoc.’ Huan ipan nopa tlatoctzi itatahua quixahuase huan quimictise.

4 “Ipan nopa tonali nochi catli quiiase ipan tlanextili quen tlajtol pannextiani mopinahuase pampa quimatise para amo melahuac huala tlen na. Amo aqui mohueyimatis huan quijtos para yaya se tlajtol pannextijquetl pampa quimatis para amo neli. Huan ayacmo aqui quinequis tlacajcayahuas huan moquentis nopa yoyomitl catli fiero quen quemantic moquentiaj tlajtol pannextiani catli melahuac ipan ni tonali. 5 Huan teipa se tlatatl catli quiselis camanali catli amo melahuac, quijtos: ‘Amo na nitlajtol pannextijquetl. Na se nimilchijquetl. Hasta quema noja eliyaya ni-oquichpil, san nitequiti mila.’

6 “Huan se quiihuis: ‘Huajca ¿para tlen lijlipintic momax?’ Huan yaya quijtos: ‘Ya ni pampa nechcocojque ipan ininchaj nohuampoyohua.’”

Quimaquilise itlamocuitlahuijca TOTECO

7 Quej ni quijtohua TOTECO Catli Quinyacana Itequihuajcahua Ma Tlatlanitij: “Nijcahuilis ma quimictica nopa Tlamocuitlahuijquetl catli na nijtitlantoc, yaya catli más nonechca huan catli san se quen na. Quena, nitlanahuatis ma quimictica nopa Tlamocuitlahuijquetl huan nochi nopa borregojme mosemanase. Huan na nijtlananas nomax ica nopa masehualme catli itztoque quen pilborregojtzitzitzi huan nojquiya tlaijiyohuise. 8 Ipan sesen eyi israelitame, ome miquise huan setzi moca-huas ipan ni tlali. 9 Huan nopa pilquentzi israelitame catli noja moca-huase ipan ni tlali, niqinpanoltis ipan se hueyi tliitl para niqinyejyecos huan niqintlapajpacchihuas hasta itzose quen plata huan oro

catli senquistoc cuali. Huan injuanti nechtzajtzilise, huan na niquintlacaquilis, huan niqijitos: 'Ya ni nomasehuahua.' Huan injuanti quijitose: 'TOTECO yaya to-Dios tojuanti.'"

TOTECO mocuepas ipan tlaltipactli

14 ¡Xijtlachilica! Ya monechcahuía nopa tonali catli itoca itonal TOTECO quema yaya tetlatzacuiltis. Huan tlacame anmechquixtilise catli amoaxca huan motlajcoxelhulise amoixpa. ²Quena, ipan nopa tonali TOTECO quichihuas para nochi tlalme ma mosentilica para quiyahualose altepetl Jerusalén. Huan quihuilanase huan moaxcatise nopa altepetl. Calaqueise ipan nochi calme para quicuisse nochi catli quinequise huan para quinchihuilise tlen hueli nopa sihuame. Huan quinichtequise tlajco nopa masehualme huan quinhuicase ilpitoque ipan seyoc tlali. Huan nopa seyoc tlajco moca-huase ipan altepetl Jerusalén.

³Pero teipa hualas TOTECO huan iseltzi quinhuilanas ininsoldados nochi tlalme. Quena, tlahuilanas quen tlahuilanqui ipan nopa tonali quema oncac hueyi tlahuilancayotl. ⁴Ipan nopa tonal TOTECO hualas huan moquetzas ipan nopa tepetl catli itoca Olivos catli mocahua iixmelac altepetl Jerusalén ica campa hualquisa tonati. Huan nopa tepetl Olivos motlajcoitas huan mochihuas se hueyi tlamayamitl catli ajsis hasta campa hualquisa tonati huan hasta campa oncalaqui. Huan quej nopa, tlajco tlen nopa tepetl mocahuas ica ajco, huan tlajco mocahuas ica tlani. ⁵Huan ipan nopa tlamayamitl amojuanti amochololtise pampa nopa tlamayamitl catli mochijtoc tlen notepe ajsis hasta Azal. Quena, ancholose quen huejcayja cholojque amohuejcapan tatahua quema mojmolini tlali ipan nopa tonali quema quihuicayaya tequitl Tlanahuatijquetl Uzías ipan tlali Judá. Huan huajca hualas TOTECO, yaya catli noDios, ininhuaya itequihujcahua huan ininhuaya nochi itlatzej-tzeloltijca masehualhua.

⁶Huan ipan nopa tonal, tonati, metztli huan sitlalime ayacmo tlahuise huan amo

oncas se tlahuili catli chicahuac niyon amo oncas tzintlayohuilotl. ⁷Elis se tonal catli senquistoc seyoc tlamantli pampa amo quema oncac se tonal quej nopa. San TOTECO iseltzi quiximati quenicatza elis nopa tonal pampa amo oncas tzintlayohuilotl niyon catli nelía tlatlanextli. Ica tiotlac ipan nopa tonal quema quinamiqui pehuas para tlayohuiyas, oncas tlahuili quen elisquía tonaya. ⁸Huan ipan nopa tonal quisas ipan altepetl Jerusalén atl catli temacas nemilistli catli yancuic. Huan tlajco nopa atl ajsis ipan nopa Hueyi Atl Mictoc huan nopa seyoc tlajco ajsis ipan nopa Hueyi Atl catli itoca Mediterráneo. Huan ne seyoc tlajco nopa atl quisas sesen xihuitl ipan nopa tonalme quema tlahuel tlaseseya huan ipan nopa tonalme quema tlatotoniya.

⁹Huan TOTECO elis Tlanahuatijquetl ipan nochi tlaltipactli. Quena, ipan nopa tonali momacase cuenta para onca san setzi Dios, yaya catli TOTECO. Huan san yaya nochi quiximatis huan quihueyichihuase. ¹⁰Nochi ni tlali mopatlas miyac quema chicahuac molinis tlali. Mochihuas quen se hueyi tlamayamitl catli pehuas altepetl Geba ica ajco tlen tlali Judá huan ajsis hasta altepetl Rimón catli mocahua ica tlani tlen altepetl Jerusalén. Huan altepetl Jerusalén sempa motlananas huan tlejcos más huejcapa pero mocahuas campa ama eltoc. Huan altepetl Jerusalén sempa mohueyichihuas. Quipiyas miyac masehualme tlen nopa puerta catli eliyaya iniaxca ininteipan ixhuhua Benjamín huan hasta nopa puerta ipan esquina campa eltoya nopa achitihui puerta. Teipa Jerusalén yas campa nopa Huejcapantic Cali Hananeel campa tlachiyaj hasta campa quichihuaj ixomeca ayo nopa tlanahuatijquetl. ¹¹Huan altepetl Jerusalén temis ica masehualme huan ayacmo quema mososolos. Nochi nopa altepetl huan imasehualhua itztose temachme.

¹²Huan ya ni elis nopa tlatzacuilti catli TOTECO quintitlanilis nochi nopa masehualme tlen nopa tlalme catli hualajque para quihuilanase altepetl Jerusalén: Inintlacayohua nochi ininmasehualhua ij-tla-

cahuis huan lochonis masque noja yoltoque huan moquetztoque ica iniicxihua. Huan lochonise iniixteyolhua huan inin-nepeni ipan incamac.

13 Ipan nopa tonali TOTECO quititlanis se hueyi majmajtli huan nochi masehualme majmahuise hasta amo quimatise tlaque quichihuase. Huan ininseltzitzitlacame quitlananase ininmax para momaquilise se ica seyoc. 14 Huan iixhuihua Judá nojquiya tlahuilanatiq por altepetl Jerusalén ica catli hualajque ipan sequinoc tlalme. Huan quintlamiichtequillise nopa masehualme nochi tlaman-tli catli tlachijchihuali ica oro, plata huan yoyomitl. 15 Huan nopa cocolistli catli TOTECO quititlanis ipan masehualme nojquiya quinajsis cahuyojme, mulas, camellos, burrojme huan nochi tlaman-tli tlapiyalme catli nopa tlahuilanani tlen sequinoc tlalme quinpixtose cam-pa mochihuase.

16 Huan nopa masehualme tlen tlalme catli quihuilanque Jerusalén huan catli noja mocahuase yoltoque, yase sesen xihuitl ipan Jerusalén para quihueyichihuatij nopa Tlanahuatijquetl catli nozona itztoc. Huan nopa Tlanahuatijquetl elis TOTECO Catli Quinyacana Itequihuaicahua Ma Tlatlanitij. Quena, yase para quichihuatij nopa ilhuitl tlen nopa pilxajcaltzitzitzi. 17 Huan sintla sequin masehualme tlen nopa sequinoc tlalme amo quinequise yase ipan altepetl Jerusalén para quihueyichihuatij nopa Tlanahuatijquetl catli itztos TOTECO Catli Quinyacana Itequihuaicahua

Ma Tlatlanitij, huajca TOTECO quichihuas para ma amo huetzi atl ipan inintal. 18 Huan sintla tlali Egipto ehuan amo quinequise yase, huajca TOTECO quichihuas ma amo huetzi atl ipan nopa tlali. Huan ininmasehualhua quiselise nopa cocolistli catli TOTECO quintitlanili nopa sequinoc tlalme catli amo quinequij yase para quichihuatij nopa ilhuitl tlen pilxajcaltzitzitzi. 19 Nopa cocolistli elis nopa tlatzauiltli catli quiselise tlali Egipto ehuan huan nochi sequinoc tlalme catli amo yase para quichihuase nopa ilhuitl tlen pilxajcaltzitzitzi.

20 Ipan nopa tonal quitlalise se tlajcuiloli ipan nochi tlamanztitzitzi huan quiijtos: “Ya ni tlaiyocatlalili para TOTECO” pampa nochi tlaman-tli elis tlaiyocatlalili para TOTECO. Huan nochi tlaman-tli quipiyase nopa tlajcuiloli hasta ininteposcamachal cahuyojme huan hasta nopa chachapalme ipan itiopa TOTECO catli ipan quisencahuaj tlacualistli. Nochi elise tlaiyocatlalilime quen nopa huejhueyi caxitl catli eltoque nechca tlaixpamitl. 21 Nochi tlamanztitzitzi hasta catli ipan quisencahuaj tlacualistli ipan altepetl Jerusalén huan altepetl Judá elise tlaiyocatlalilime para TOTECO. Huan inijuanti catli yohuij huan quihuicase se tlapiyali para quimictise, quicuisse nopa chachapalme catli quitequihuise para ipan quiicxitise inacayo nopa tlapiyali. Huan ipan nopa tonali ayacmo oncas masehualme catli fiero o catli tlanemacaj ipan itiopa TOTECO, Yaya Catli Quinyacana Itequihuaicahua Ma Tlatlanitij.